

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N J E

o koncentraciji privrednog subjekta Mljekara a.d. Banjaluka, Bosna i Hercegovina i privrednog subjekta Mlijekoprodukt d.o.o. Kozarska Dubica, Bosna i Hercegovina

Sarajevo
20. juli, 2007. godine



Broj: 01-05-26-013-30-II/06
Sarajevo, 20. jula 2007. godine

Na osnovu člana 25. stav (1) pod e), člana 42. pod d), a u vezi sa čl. 12., 14., 16. i 18., te u skladu sa članom 24. stav (2) Zakona o konkurenciji («Službeni glasnik BiH», broj 48/05), po Prijavi namjere koncentracije između privrednog subjekta Mljekara a.d. Banja Luka, Mladena Stojanovića 28, Banja Luka, Bosna i Hercegovina (zastupane po Branku Mariću advokatu iz Sarajeva, Mehmeda Spahe 24, 71000 Sarajevo) i privrednog subjekta Mlijekoprodukt d.o.o. Kozarska Dubica, Vrioci bb, Bosna i Hercegovina zaprimljene pod brojem: 01-05-26-013-20-II/06 dana 03.04.2007. godine, Konkurencijsko vijeće, na 48. (četrdesetosmoj) sjednici održanoj dana 20. jula 2007. godine, je donijelo

R J E Š E N J E

1. Ocjenjuje se dopuštenom koncentracija na tržištu prerade mlijeka i proizvodnje mliječnih proizvoda u Bosni i Hercegovini, koja nastaje sticanjem većinskog vlasničkog udjela privrednog subjekta Mljekara a.d. Banja Luka, Mladena Stojanovića 28, Banja Luka, Bosna i Hercegovina, u privrednom subjektu Mlijekoprodukt d.o.o. Kozarska Dubica, Vrioci bb, Bosna i Hercegovina.
2. Zbog nepodnošenja Prijave namjere koncentracije u zakonom predviđenom roku, izriče se novčana kazna privrednom subjektu Mljekara a.d. Banja Luka, u visini od 10.000,00 KM (desethiljada konvertibilnih maraka), koju je dužan platiti u roku od 8 (osam) dana, od dana prijema ovog Rješenja.
3. Ovo Rješenje o koncentraciji upisuje se u Registar koncentracija.
4. Ovo Rješenje je konačno i bit će objavljeno u «Službenom glasniku Bosne i Hercegovine», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Privredni subjekat Mljekara a.d. Banja Luka, Mladena Stojanovića 28, Banja Luka, putem ovlaštenog punomoćnika advokata Branka Marića iz Sarajeva, Mehmeda Spahe 24, 71000 Sarajevo (u daljem tekstu: Podnosilac prijave ili Mljekara Banja Luka), je dostavio Konkurencijskom vijeću dana 03.04.2007. godine Prijavu namjere koncentracije (u daljem tekstu: Prijava), kojom namjerava steći većinsko vlasništvo u privrednom subjektu Mlijekoprodukt d.o.o. Kozarska Dubica (u daljem tekstu: Mlijekoprodukt Kozarska Dubica).

Podnosilac prijave je dostavio Konkurencijskom vijeću nepotpunu Prijavu, koju je dopunio dana 17.04.2007. godine broj: 01-05-26-013-22-II/06.

Konkurencijsko vijeće, nakon pregleda dostavljene dokumentacije, dana 23.04.2007. godine, je uputilo Podnosiocu prijave zahtjev za dopunu Prijave potrebnom dokumentacijom, u skladu sa članom 30. Zakona o konkurenciji (u daljem tekstu: Zakon) i Odlukom o načinu podnošenja prijave za ocjenu koncentracije privrednih subjekata («Službeni glasnik BiH», broj 95/06).

Podnosilac Prijave je dostavio traženu dokumentaciju (dana 24.04.2007. godine broj: 01-05-26-013-24-II/06 i dana 30.04.2007. godine broj: 01-05-26-013-25-II/06) čime su se stekli uslovi za izdavanje Potvrde o urednoj i kompletnoj Prijavi, u smislu člana 30. stav (3) Zakona.

Nakon toga, Konkurencijsko vijeće je dana 22.05.2007. godine Podnosiocu prijave izdalo Potvrdu broj: 01-05-026-013-26-II/06, o prijemu kompletne i uredne Prijave.

Podnosilac Prijave je naveo da Prijava nije dostavljena na ocjenu ni jednom nadležnom organu van teritorije Bosne i Hercegovine, u smislu člana 30. stav (2) Zakona.

Ukupni prihod privrednog subjekta Mljekara Banja Luka ostvaren na tržištu Bosne i Hercegovine, u 2006. godinu, je iznosio (..)**¹ KM, a ukupno prihod privrednog subjekta Mlijekoprodukt Kozarska Dubica je iznosio (..)** KM, te je ispunjen uslov obaveze prijave namjere koncentracije, u smislu člana 14. stav (1) tačka b) Zakona.

Analizirajući podatke iz Prijave i ostalu dostavljenu dokumentaciju, na osnovu koje je izvršena ocjena pozitivnih i negativnih efekata predmetne koncentracije, u smislu člana 17. Zakona, Konkurencijsko vijeće je primjenjujući odredbe Zakona, Odluke o načinu podnošenja prijave i kriterijima za ocjenu koncentracija privrednih subjekata, te Odluke o utvrđivanju relevantnog tržišta («Službeni glasnik BiH», broj 18/06), utvrdilo sljedeće:

1. Pravni osnov i oblik koncentracije

Pravni osnov ove koncentracije je Ugovor o prijenosu i preuzimanju udjela zaključen dana 25.12.2006. godine, između (prenosioca) g-dina Mileta Arsenića iz Kozarske Dubice, Vreoci bb, JMB (..)***, Bosna i Hercegovina, 100,0% vlasnika privrednog subjekta Mlijekoprodukt d.o.o. Kozarska Dubica, i (sticatelja) privrednih subjekata Danube Foods d.o.o. Sarajevo, Bosna i Hercegovina, Mljekara a.d. Banja Luka i privrednog subjekta Imlek a.d. Beograd, Republika Srbija.

Predmetnim Ugovorom također, predviđeno je da isti stupi na snagu danom ovjere pred nadležnim organima. Ugovor je ovjeren dana 14.02.2007. godine kod Drugog Općinskog Suda u Beogradu, Republika Srbija pod brojem: OV 2269, a dana 15.02.2007. godine kod Osnovnog Suda u Banja Luci, pod brojem: OV 1795/7 i kod Osnovnog Suda u Prijedoru, pod brojem: 077-1-OV-07-000-099.

¹ (..)** - podaci predstavljaju poslovnu tajnu

Ugovorom od 25.12.2006. godine prenosilac je prenio svoj cjelokupni udio na sticatelje, oslobođen od bilo kakvih tereta i/ili prava trećih lica, koji predstavlja 100,0% udio osnovnog kapitala u privrednom subjektu Mlijekoprodukt Kozarska Dubica, te su sticatelji stekli udjele i pripadajuća prava vlasnika u privrednom subjektu Mlijekoprodukt Kozarska Dubica.

Ovom Ugovoru je prethodilo nekoliko ugovora o prijenosu i preuzimanju udjela koji nikada nisu realizovani u praksi, a sklopljeni su uz saglasnost g-dina Mileta Arsenića, 100,0% vlasnika privrednog subjekta Mlijekoprodukt Kozarska Dubica i to:

-Ugovor 1 i 2 od dana 04.09.2006. godine o prijenosu i preuzimanju udjela, kojim g-din Mile Arsenić svoj (..)** % udio u privrednom subjektu Mlijekoprodukt Kozarska Dubica prenosi na privredni subjekat Somboled a.d. Sombor, Republika Srbija,

-Ugovor o ustupanju od 11.10.2006. godine zaključen između privrednog subjekta Somboled i privrednog subjekta Danube Foods d.o.o. Beograd, kojim privredni subjekat Somboled uz saglasnost g-dina Mileta Arsenića, vlasnika privrednog subjekta Mlijekoprodukt Kozarska Dubica, na privredni subjekat Danube Foods d.o.o. Beograd prenosi (..)** % dio osnovnog kapitala Mlijekoprodukta,

-Ugovor o ustupanju broj: 12 od dana 27.10.2006. godine zaključen, između privrednog subjekta Danube Foods d.o.o. Beograd, Republika Srbija i privrednog subjekta Danube Foods d.o.o. Sarajevo, Bosna i Hercegovina, kojim privredni subjekat Danube Foods d.o.o. Beograd, ustupa odnosno prenosi (..)** % osnovnog kapitala u privrednom subjektu Mlijekoprodukt Kozarska Dubica, uz saglasnost g-dina Mileta Arsenića, vlasnika privrednog subjekta Mlijekoprodukt Kozarska Dubica na privredni subjekat Danube Foods d.o.o. Sarajevo, i

-Ugovor o ustupanju broj: 2457 od dana 23.11.2006. godine, kojim privredni subjekat Danube Foods d.o.o. Beograd, Republika Srbija preostalih (..)** % kapitala u privrednom subjektu Mlijekoprodukt Kozarska Dubica, ustupa odnosno prenosi na privredni subjekat Imlek a.d. Beograd, Republika Srbija, također uz saglasnost Mileta Arsenića, vlasnika privrednog subjekta Mlijekoprodukt Kozarska Dubica.

Nakon navedenih, nerealizovanih ugovora koji su prethodili Ugovoru o ustupanju dijela prava i obaveza iz ugovora od dana 25.12.2006. godine, kao pravnom osnovu ove koncentracije, kojim privredni subjekat Danube Foods d.o.o. Sarajevo, prenosi na privredni subjekat Mljekaru Banjaluka udio od 66,71% osnovnog kapitala privrednog subjekta Mlijekoprodukt Kozarska Dubica, vlasnička struktura privrednog subjekta Mlijekoprodukt Kozarska Dubica je sljedeća:

- | | |
|--|--------|
| - privredni subjekat Mljekara a.d. Banjaluka, Bosna i Hercegovina | 66,71% |
| - privredni subjekat Danube Foods d.o.o. Sarajevo, Bosna i Hercegovina | 20,00% |
| - privredni subjekat Imlek a.d. Beograd, Republika Srbija | 13,29% |

Na osnovu gore navedenog privredni subjekat Mljekara Banja Luka sticanjem većinskog vlasništva u privrednom subjektu Mlijekoprodukt Kozarska Dubica postaje obveznik prijave namjere koncentracije, na osnovu čl. 12., 14. i 16. Zakona.

Pravni oblik koncentracije je sticanje kontrole privrednog subjekta Mljekara Banja Luka, nad privrednim subjektom Mlijekoprodukt Kozarska Dubica, putem preuzimanja većinskog udjela u osnovnom kapitalu u smislu člana 12. stav (1) tačka b) Zakona.

2. Učesnici koncentracije

2.1. Privredni subjekat Mljekara a.d. Banja Luka

Privredni subjekat Mljekara a.d. Banja Luka, Bosna i Hercegovina upisan je u sudski registar u Banja Luci pod brojem: 1-71-00, dana 24.10.2003. godine. Osnovna djelatnost privrednog subjekta Mljekara Banja Luka je proizvodnja i prerada mlijeka.

Većinski vlasnik kapitala privrednog subjekta Mljekara Banja Luka (65,75%) je privredni subjekat Mlekar a.d. Subotica, Republika Srbija, a čiji je većinski vlasnik (..)** % privredni subjekat Danube Foods BV Holandija.

Iz analize vlasničke strukture učesnika koncentracije, utvrđeno je da je privredni subjekat Mljekara a.d. Banja Luka zavisno društvo, čiji je većinski vlasnik privredni subjekat Danube Foods BV Holandija, koji ima direktne i indirektne udjele u kapitalu navedenih i međusobno povezanih društava, kako slijedi :

R.br.	Naziv društva	Udio (%) u Mlijekoproduku	Vlasnik društva	Vlasnički udio u društvu %
01.	Mljekara a.d. Banjaluka	66,71	Mljekara a.d. Subotica	65,75
02.	Mljekara a.d. Subotica	0	Danube Foods BV Holandija	(..)**
03.	Danube Foods d.o.o. Beograd	0	Danube Foods BV Holandija	(..)**
04.	Danube Foods d.o.o. Sarajevo	20,0	Danube Foods BV Holandija	(..)**
05.	Imlek a.d. Beograd	13,29	Danube Foods Holandija	(..)**
06.	East Milk d.o.o. Sarajevo	0	Danube Foods d.o.o. Sarajevo	(..)**

Privredni subjekat Mljekara Banja Luka nema supsidijarnih društava u Bosni i Hercegovini ni izvan Bosne i Hercegovine.

2.2. Privredni subjekat Mlijekoprodukt d.o.o. Kozarska Dubica

Privredni subjekat Mlijekoprodukt d.o.o. Kozarska Dubica upisan je u sudski registar u Banja Luci dana 16.03.2000. godine pod brojem: 1-9244-00. Osnovna djelatnost privrednog subjekta Mlijekoprodukt Kozarska Dubica je proizvodnja i prerada mlijeka.

Osnivač i 100,0% vlasnik privrednog subjekta Mlijekoprodukt Kozarska Dubica je g-din Mile Arsenić iz Kozarske Dubice, Vreoci bb, JMB (..)**.

Privredni subjekat Mlijekoprodukt Kozarska Dubica nema supsidijarnih društava u Bosni i Hercegovini ni izvan Bosne i Hercegovine.

3. Analiza relevantnog tržišta

Članom 3. Zakona odnosno čl. 4., 5. i 6. Odluke o utvrđivanju relevantnog tržišta je određeno relevantno tržište kao tržište određenih proizvoda /usluga, koji su predmet obavljanja djelatnosti privrednih subjekata, na relevantnom geografskom tržištu.

U analizi relevantnog tržišta učesnika predmetne koncentracije Konkurencijsko vijeće je utvrdilo da relevantno tržište usluga čini tržište prerade mlijeka i proizvodnje mliječnih proizvoda. Budući da podnosilac prijave djeluje na cijelom teritoriju Bosne i Hercegovine, relevantnim geografskim tržištem smatrat će se cijeli teritorij Bosne i Hercegovine.

Stoga, relevantno tržište predmetne koncentracije čini prerada mlijeka i proizvodnja mliječnih proizvoda na cijelom teritoriju Bosne i Hercegovine.

4. Procjena koncentracije

Tržišni udio na relevantnom tržištu najznačajnijih mljekara u Bosni i Hercegovini u 2006. godini :

R.br.	Naziv privrednog subjekta /mljekare	Tržišni udio (%)
01.	Mlijekoprodukt Kozarska Dubica	22,0
02.	Meggle - Bihać	16,2
03.	PPM Tuzla	11,5
04.	Immer - Gradačac	8,5
05.	DTD Šnjegotina	4,7
06.	Mljekara – Livno	3,8
07.	Milkos Sarajevo	3,7
08.	Tippas – Posušje	3,5
09.	Natura Vita Teslić	3,4
10.	Mljekara a.d. Banja Luka	2,7
11.	Ostali	20,0
	Ukupno	100,00
	Ukupno (01+10)	24,7

Zajednički udio na relevantnom tržištu privrednog subjekta Mljekara Banja Luka i privrednog subjekta Mlijekoprodukt Kozarska Dubica nakon predmetne koncentracije iznositi će 24,70 %.

Prema podacima iz Prijave i relevantnih ministarstava entiteta, za 2006. godinu, mljekare u Bosni i Hercegovini su obezbijedile svježe mlijeko za preradu iz sljedećih izvora:

- mljekare iz Republike Srpske obezbjeđuju 93,3% mlijeka iz Republike Srpske i 6,7% iz Federacije Bosne i Hercegovine;
- mljekare iz Federacije Bosne i Hercegovine obezbjeđuju 81,5% iz Federacije Bosne i Hercegovine i 18,3% iz Republike Srpske te 0,2% iz uvoza.

Također je iz navedenih izvora utvrđeno da je u Bosnu i Hercegovinu, u 2006. godini, ukupno uvezeno, a izraženo kroz ekvivalent svježeg mlijeka, 118,5 miliona litara mlijeka što je za 15,0% manje u odnosu na 2005. godinu. Najveći uvoz ostvaren je iz Republike Hrvatske - 41,5%, zatim Savezne Republike Njemačke - 21,9%, Republike Slovenije - 16,0% i Republike Srbije - 11,5%, od ukupnog uvoza mliječnih prerađevina u Bosni i Hercegovini. Od toga ukupno ostvarenog uvoza na uvoz mliječnih prerađevina, posebno sira, se odnosi 49,0%.

Konkurencijsko vijeće je nakon procjene i analize podataka i činjenica u postupku donošenja predmetnog Rješenja, utvrdilo da koncentracija predmetnih privrednih subjekata ne spriječava, ograničava niti narušava tržišnu konkurenciju na relevantnom tržištu prerade mlijeka i proizvodnje mliječnih proizvoda u Bosni i Hercegovini, te je odlučeno kao u dispozitivu ovog Rješenja.

5. Novčana kazna

Na osnovu člana 16. Zakona, privredni subjekti učesnici koncentracije obavezni su podnijeti prijavu namjere koncentracije, u smislu čl. 12. i 14. Zakona, u roku od osam dana od dana zaključenja sporazuma, objavljivanja javne ponude dionica ili sticanja kontrole, zavisno od toga šta nastupi ranije.

Ugovor o ustupanju dijela prava i obaveza iz ugovora od dana 25.12.2006. godine kao pravni osnov predmetne koncentracije, stupio je na snagu danom ovjere kod nadležnih organa tj. dana 15.02.2007. godine, a Prijava Konkurencijskom vijeću je podnesena dana 03.04.2007. godine, odnosno sa 39 dana zakašnjenja.

Imajući u vidu navedene odredbe Zakona i nakon uvida u dostavljenu dokumentaciju Konkurencijsko vijeće je utvrdilo da privredni subjekat Mljekara Banja Luka, nije prijavio predmetnu koncentraciju u Zakonom predviđenom roku, u smislu člana 16. stav (1) Zakona.

Konkurencijsko vijeće je uzimajući u obzir sve relevantne okolnosti i činjenice utvrdilo postojanje povrede u smislu člana 16. Zakona i stoga može izreći novčanu kaznu u visini do 1,0% od ukupno ostvarenog prihoda iz predhodne godine poslovanja, u smislu člana 49. stav (1) tačka b) Zakona.

Konkurencijsko vijeće je izreklo novčanu kaznu privrednom subjektu Mljekara a.d. Banjaluka u iznosu od 10.000,00 KM, što predstavlja (..)** % od ukupnog godišnjeg prihoda za 2006. godinu.

Konkurencijsko vijeće je utvrdilo da je Podnosilac prijave odmah nakon potpisivanja Ugovora o ustupanju dijela prava i obaveza iz ugovora od dana 25.12.2006. godine, odnosno njegovog stupanja na snagu dana 15.02.2007. godine nastavio sprovođenje predmetne koncentracije na taj način što je pokrenuo postupak registracije navedenog ugovora o stranom ulaganju kod Ministarstva vanjske trgovine i ekonomskih odnosa Bosne i Hercegovine. Rješenjem Ministarstva vanjske trgovine i ekonomskih odnosa Bosne i Hercegovine izdatog dana 27.03.2007. godine pod brojem: 02-2-19-1330/07 je pokrenut postupak upisa u sudski registar preduzeća kod Osnovnog suda u Banja Luci, za koji je isti Sud dana 03.04.2007. godine izdao Rješenje, registrovano u ulošku broj: 1-944-00 Banja Luka. Na osnovu izdatog Rješenja je utvrđeno da je

sudska registracija završena istog dana kada je podnesena i Prijava za odobrenje navedene koncentracije Konkurencijskom vijeću Bosne i Hercegovine.

Analizirajući sve navedene činjenice Konkurencijsko vijeće je u smislu člana 52. Zakona, steklo uvjerenje da je Podnosilac prijave s namjerom izvršio povredu člana 18. stav (8) Zakona, po kojem se koncentracija nije mogla provesti prije donošenja rješenja, kojim se potvrđuje usklađenost predmetne koncentracije sa čl. 12. i 14. istog Zakona.

Konkurencijsko vijeće je prilikom određivanja visine kazne također uzelo u obzir i potpunu saradnju privrednog subjekta Mljekara Banja Luka tokom cijelog predmetnog postupka ocjene koncentracije.

Konkurencijsko vijeće je odredilo visinu novčane kazne imajući u vidu činjenicu da kažnjavanje podnosioca prijave nije prvenstveni cilj, već izrečena kazna ima namjeru upozoriti na obavezu primjene Zakona, kao i preventivno djelovanje na nekršenju njegovih pojedinih odredaba.

6. Administrativna taksa

Na ovo Rješenje podnosilac Prijave, u skladu s članom 2. tarifni broj 107. stav (1) tačka d) pod (1) Odluke o administrativnim taksama u vezi sa procesnim radnjama pred Konkurencijskim vijećem («Službeni glasnik BiH», broj 30/06), obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

7. Pouka o pravnom lijeku

Protiv ovog Rješenja nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

Predsjednik

Sanja Božić